

Wednesday, April 16, 2025

Time - 2:30pm - 2:35pm

REGIONAL NEWS BULLETIN

(MIDDAY)

CM

Chief Minister Pu Lalduhoma'n Mizo lemziak thiamte kutchhuak a hmuh atangin an theihna san zia a hmuh thu leh Mizo hnam zia phochhuak thei kutchhuak mawi nei zel tura a duh thu a sawi.

Vawiina Lianchhiari Run Mini Theatre, Aizawl-a UNESCO World Art Day, 2025 leh lemziak phochhuah a hawnnaah he thu hi Chief Minister chuan a sawi a. Pu Lalduhoma chuan Mizo folk art tha taka phochhuah anih chuan Mizoram leh hnam chawimawina a nih thu leh khualzin hip nan pawha tha tak a nih thu a sawi.

Chief Minister chuan lemziak leh hnam nihphung 'culture' chu thil inzawm flat a nih thu sawiin hnam tin chanchin hlui hriatna hnar chu an 'lemziak' a nih zel thu a sawi a. Art leh culture inzawm flat chu UNESCO chuan thiam takin hmanruaah a hmang tih sawiin hnam nihphung hrang hrang te humhimin hmanlai lemziak leh kawng chi hrang hranga art phochhuah te, milim ker te, lam te thlengin a humhalh tih a sawi a. UNESCO chuan hmun humhalh bik, 'world heritage site' puangin thil hlui vawnhimna hmun hrang hrangte nasa takin a kalpui tih Chief Minister chuan sawiin vawiina hman mek World Art Day pawh kum 2019-ah UNESCO in pawmpuiin UNESCO World Art Day tia sawi a lo ni ta a ti a. Mizoten hnamdangte hriat an hlawnhna langsar ber chu 'art' ah a nih thu sawiin Mizote lemziak, zai, lam, incheina leh hnam ze ropui tak tak te chuan Mizoram a chawimawi hle a ni a ti.

International Association of Art (IAA) - India President Pu Manaj Saha pawhin he hunah hian thu sawiin Mizorama hmun hlui tha tak te chuan ecotourism sector lamah theihna sang tak an neih thu a sawi a, IAA pawhin UNESCO World Heritage site-a siam tura tan a lak dawn thu a sawi a ni.

World Art Day lawmnaah hian lemziak leh art hrang hrang phochhuahna, exhibition buatsaih a ni a. A lawmna hun hi Mizoram sorkar department pali - Art & Culture, I&PR, Tourism leh Commerce & Industries department tangkawpa buatsaih a ni a. I&PR Minister Dr Vanlalhlana leh Art & Culture Minister Pu C. Lalsawivunga te chuan khualzahawm niin he hun hi an hmanpui bawh a ni.



ALL NGO & ZORO REPRESENTATIVES CALL ON UNION HOME MINISTER

Mizoram tlawmngai pawl intelkhawm NGO Coordination Committee leh ZORO aiawhten vawiin hian Union Home Minister Amit Shah an hmu dawn a, an inkawmna ah hian Free Movement Regime thiah chungchang leh ramri hung chungchang an sawi ang.

Thudawn danin NGO Coordination Committee hi an Chairman Central YMA President Pu Lalhmachhuana hovin an kal a, Central YMA bakah hian tlawmngai pawl dang pawh an aiawh intirin New Delhi-a Union Home Minister hmu tur hian nimin khan an kal a, ZORO aiawh hian ZORO Legal Advisory Board member pahnih an kal bawk a ni.

Union Home Minister hian thla liam ta March ni 15-a Mizoram alo tlawh tum khan ZORO hruaitute leh tlawmngai pawl hruaitute a hmuhna ah FMR thiah leh ramri hung chungchang alo sawipui tawh a, Union Home Minister Amit Shah hnenah hian Mizoram diLna hrang hrang lo thlen niin Manipura zohnahthlak te tana rorelna hran neih chu an duh ber ani tih anlo thlen tawh a ni.



AMECC PROTEST

All Mizoram CSS Employees Coordination Committee-chuan vawiin atang khan Sawrkar laka lungawi lohna (Pen down strike) an kalpui tan a, April 17 Ningani thleng lungawilohna kalpui an tum.

Pen Down Strike neih an tum chungchang hi Chief Secretary mawhphurhna latu Pu H. Lalengmawia hovin nimin khan an sawiho a ni a, an thutkhawmnaah hian Pen Down Strike neih an tum chu thulh turin sorkar-in ngen mahse, Sorkar lak atangin an thil phut chungchangah lungawipui tur thu an hmuh loh avangin Pen Down Strike hi an kalflang pui a ni.

AMCECC General Secretary Pu Vanlalpeka chuan Mizoram sawrkar hnuaia CSS employee ten hun rei tak chhung sawrkarah an dinhmun siamthat anih theih nan dilna an lo thlen tawh thin a ti a, CSS Regularisation Scheme nikuma passed tak chu a taka hman ngei an duh tih sawiin Mizoram puma CSS-a thawk mi sing 1 chuang te chu sawrkar kut ke ber an nih avangin a ngheta dah awm tak vek an ni a ti a, tun dinhmunah MR an bill theihloh bakah pay scale mumal neilo in pension pawh awmlo in an thawk thin a ti a, CSS Regularisation Scheme chu DP&AR thuchhuahin a hnawl avangin hreh tak chungin lungawilohna an kalpui a ngai a ti a, Mizoram sawrkar chuan lungawi lohna lantir an tumah hnathawk lote chu CCS (Conduct) Rules, 1964 hmanga

an hlawh cut a ni dawn tih chu sawi mahse nawrh chu an kaltlang pui dawn tih an sawi bawk.

Hetihlai hian vawiin khan Chief Secretary charge la mek tu Pu H. Lalengmawia'n Press Conference kovin CSS hnuaia thawk te chu dik leh mumal taka lak an awm loh avangin dah ngheh theih an nilo a ti a, DPC kaltlanga lak an nih loh avang leh induhsakna avanga hna inpek a tam hle a ti a, lak dan mumal lo taka lak an nih avangin seniority list pawh an nei hleithei lo tih sawiin NHM leh SSA thawktu zingah an tam zual a ti a, CSS Regularisation Scheme kalpui tura thil tul leh pawimawh tak chu inter seniority niin hei hi tihfel a harsat dawn avang leh mumal lo taka thil a kal tam tawh avangin CSS Regularisation Scheme chu kalpui theih a nilo a ti a, India danpui hnuaia Article 14 leh Article 16 an bawhchhe thiango tih sawiin dan anga lak loh ten an hmang ve theilo tih a sawi.

Pu H. Lalengmawia chuan CSS hnuaia dan loa lak te dah ngheh an nih chuan an tlukpui ten court ah sawrkar a khin chuan sawrkarin thiam a chang dawnlo a ti a, mitin angkhat veka en a ngai tih sawiin AMECC thilphut ti hlawhtling tur chuan Mizoram sawrkarin India dan a bawhchhiat a ngai dawn a ti a, lungawilohna an lantir chhungin sawrkarin hlawh a cut sak dawn tih sawiin an kal thui zel chuan an service tawp palh thei ani tih a sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.



ZIRTIRI COLLEGE PROTEST

Vawiin khan Govt. Zirtiri Residential Science College zirlaite chu an zirtirtu Pi Lalthanpuui Hnamte sawn tur duhlovin an college luhkaah an pungkhawm.

College zirlai hruaituten Akashvani an hrihl danin an zirtirtu ni mek Pi Lalthanpuui Hnamte, Botany department-a Asst. Professor chu Serchhip college a thawk mek Dr. Lalmangaihzuai nen sorkarin thlak thleng an tum thu an sawi a. Pi Lalthanpuui Hnamte chu an college tana tangkai tak niin, zirtir hna mai bakah college thil pawimawh hrang hrang tangkai leh nihna pawh chelh hnem tak, club hrang hrang hruaitu ni mek a nih thu an sawi a. An college tana zirtir hna mai bakah hna tangkai tak tak thawk mek tu a nih avangin sawn chhuah an duh loh thu an sawi a ni.

Zirlaite hi vawiin chawhma khan college gate-ah pungkhawmin 'silent protest' an huaihawt a. Chawhma dar 11 atang zirlai nawlpui punkhawm titawpin a remchang apiang la thutkhawm ni se an ti a. Chawhnu dar 1:30

thleng thukhawmin Principal ngenna avangin vawiin atan chuan an punkhawm an tihtawp rih thu an sawi a. Zirlai hruaitute chuan an kal zel dan tur an la rel dawn thu an sawi a, muanawm taka buaina chhuak nasa lo zawnga hmalak an tum thu an sawi a ni.

